

1559

Patrum Collegio convocato, ingenti animi mœrore, summa iracundia intermisso in nepotes invehitur; *immunem se ab eorum criminibus; quæ perperam gesta sint, non sibi tribui debere. Quid enim faceret intra palatii parietes inclusus, ad quem nihil, nisi per alios perveniret? Daturum se operam, ut aliorum errata optimo, atque egregio ipsius in rempublicam christianam animo corrigantur.* Mox quibusdam vectigalibus, quæ se incio indicta aiebat, sublatis, urbis custodiæ Camillum Ursinum præfecit; cui paucos post dies defuncto, Joannem Antonium Ursinum, Gravinæ Ducis fratrem, suffecit. Viginti Cardinalium, ac quadraginta Curiae ministrorum collegium instituit, a quo secum pontificiæ ditionis causæ cognoscerentur; edicto promulgato, ut iis, qui ob magistratuum avaritiam, ac sordes rerum suarum jacturam fecissent, tutus ad eum aditus foret; se ex æquo jus illis administraturum.

Paulus Pont. Episcopos ad ecclesias regendas præfisci imperat.

Dominicus Bolanus Brixiae Episcopus declaratus.

*Brixienſis & Cremo-
neſium de
Ollio amne
controverſie a Bola-
no & An-
guſola com-
poſita.*

Is licet domesticorum curis, atque urbis, ecclesiasticarumque ditionum tuendarum sollicitudinibus distentus, assiduus tamen in religionis quæstionibus cognoscendis, atque hæreseos labe vel infectis, vel suspectis coercendis, atque exterminandis erat. Episcopos, ut ad sibi creditas ecclesias regendas, urbe relicta, proficiscerentur, quæ res ea tempestate durior plerisque videbatur, compulit. In cooptandis vero Episcopis solers adeo, atque acerrimus perscrutator erat, ut cum vix unquam sibi satisfaceret, ambigua cunctatione menses, atque annos tereret. Id in nonnullis Venetorum civitatibus contigit. Nam ob Durantis Cardinalis, Brixiae Antistitis, obitum multis Senatus precibus fatigatus post annum Dominicum Bolanum, Equitem, Francisci filium, illius tunc præturam civitatis gerentem, Episcopum declaravit; quem grave onus detrectantem ad eam provinciam alacri suscipiendam animo per literas est cohortatus: præceptis obtemperaret, divino nutui acquiesceret, colla cælesti jugo subderet, peramplam ecclesiam regendam spe divini Numinis fretus susciperet. Illum prætura, publicique muneribus abdicatum Senatus Brixienſium precibus ductus, infueto exemplo definiendis annis Ollii controversiis cum Anguſola Senatore interesse voluit; rebusque ex Patrum sententia compositis, Brixiam reversus sacris initiatus est.

Rem